



## 桂花

大自然有當多个花，上千上萬个花種，分佈在各大洲、各各國家、各各地方、縣市。當多國家、縣市也有代表个國花、縣花。有兜人為著愛看靚靚个國花，看準時節就坐飛機、坐船仔去到外國看，像係去日本看櫻花、去美國看玫瑰花、去英國看薔薇……。也有兜人會坐等火車、公車，或者駛等車仔、騎等奧多拜去到各縣市、各地方去看花，像係去到臺北个陽明山看杜鵑花、去到臺南市看鳳凰花、去到澎湖看天人菊……。

花，當多人愛看，佢乜當好看！佢好看个花，係種在吾老屋頭前歸排个桂花。三十年前，老屋正起，吾爸就想講該屋前空地，做得種兜麼个花？想去想轉，恁堵好種樹秧仔賣个黃先生，有兩三十頭个桂花好讓，吾爸就摺該兩三十頭个桂花種落去。兩三年仔，桂花就開始開花哩！逐年秋天桂花花開，細細蕊黃黃个花，打到愛結又愛結，結在(do)滿樹枝。秋風吹啊來，桂花个花香黏時衝啊入鼻公，正經還香哪！莫看該桂花細細蕊仔毋打眼，毋過細罔細佢該醺醺个花香味，一下就做得充滿屋間呢！老古人就識講過「玉蘭有風傳三里，桂花無風十里香」，細細蕊仔个桂花，因爭花香搵腹實落，聽講做得傳到十里外，當遠个地方去呢！

佢好看桂花，毋係桂花生到當大蕊；佢好看桂花，毋係桂花个花色當打眼！佢好看桂花，係因為桂花雖然生到細細蕊仔，毋過佢个花香實疊！就像做一個人，三不二時充實自家个內涵、培養自家个能力，平常毋會講自家幾會又幾會，等到愛用著个時節，就做得一項一項摺佢展現出來，毋使靠別人个宣傳，別人自然做得感受著自家个內涵摺能力。

佢好桂花，係因為桂花還有當多實用个價值！嫩嫩个桂花，無打藥仔，摘幾蕊仔分自家噍啊！該甘甘嫩嫩个味緒，無食過个人仰會知！記得老屋該條个狗仔，當好食佢摘分佢食个桂花，佢食著个味緒，毋知有同吾个共樣無？當然，係有罇數量个桂花還做得拿來做桂花茶、桂花釀、桂花糕、桂花雪圓、桂花板、桂花酒恁多樣。

桂花不管用到哪位，該香味永久毋會跌忒呢！

作者：邱一帆

### ☆詞彙學習☆

【想去想轉】xiong` hi xiong` zon`：想來想去。【實疊】siid tiab：紮實、實在。

【愛結又愛結】oi gied` iu oi gied`：結實疊。【幾會又幾會】gi` voi iu gi` voi：吹噓自己多麼有能力。

【細罔細】se mong` se：小歸小。

【打藥仔】da` iog e`：噴灑農藥。

【搵腹實落】zad bug` siid log：形容很紮實、很實在的樣子。

【仰會知】ngiong` voi di`：怎麼知道。

【跌忒】died` ted`：掉了、消失。